



D. ENRIQUE SALVADORES LÓPEZ, maior de idade, veciño de Pontedeume (A Coruña), con DNI nº 32.834.924 D, e en calidade de SECRETARIO do Club Náutico Firrete da mencionada localidade.

CERTIFICO: Que, na Asemblea Xeral Extraordinaria debidamente convocada e celebrada o día 12 de marzo de 2006 ás 12:30 horas, acordouse por unanimidade a modificación dos estatutos do club, para a súa adaptación á lexislación vixente, quedando redactados da seguinte maneira:

ESTATUTOS DO CLUB

Club Náutico Firrete

CAPÍTULO I

NORMAS XERAIS

Artigo 1.- O Club Náutico Firrete é unha asociación privada con personalidade xurídica e capacidade de obrar, integrada por persoas físicas, que ten como obxecto exclusivo ou principal a práctica da actividade física e deportiva polos asociados, así como a participación en actividades e competicións oficiais, sen ánimo de lucro.

Artigo 2.- O Club Náutico Firrete fomentará a actividade física e deportiva en xeral e do piragüismo en particular, para o que elaborará anualmente un programa de actividades que atenda:

- a) Á promoción do piragüismo.
- b) Á docencia e tecnificación deportiva.
- c) Á práctica deportiva competitiva.
- d) Ao piragüismo como actividade lúdico-recreativa.

Practicará como principal modalidade deportiva a de piragüismo, e solicitará a ratificación dos estatutos e a inscrición no Rexistro de asociacións deportivas e deportistas de Galicia, de conformidade coa Lei xeral do deporte de Galicia.

O Club Náutico Firrete poderá acordar a creación de novas seccións para a práctica doutras modalidades deportivas.

Artigo 3.- Este club foi constituído mediante acta fundacional subscrita perante notario o 22 de febreiro de 1985. Así mesmo, foi inscrito no Rexistro de asociacións deportivas e deportistas de Galicia co número 618, o día 6 de setembro de 1985.

Actualmente, o domicilio social do Club Náutico Firrete fixase na avda. do Peirao s/n, C.P.: 15600, poboación: Pontedeume, concello de Pontedeume, provincia da Coruña, teléfono: 607604909, e-mail: firrete@yahoo.es. Tamén fixase a seguinte dirección postal: apartado de correos nº 13, 15.600, Pontedeume, A Coruña.



O presidente, cando as circunstancias o aconsellen, poderá acordar o cambio do domicilio social dentro da mesma localidade. Para o traslado do domicilio a outra localidade, que deberá ser sempre dentro do territorio da Comunidade Autónoma de Galicia, será necesario o acordo maioritario da asemblea xeral extraordinaria.

En ambos os casos, o traslado de domicilio social non implica modificación estatutaria, e terá de ser notificado aos socios, e ao Rexistro de asociacións deportivas e deportistas de Galicia.

CAPÍTULO II

CLASES DE SOCIOS, ADMISIÓN, DEREITOS E OBRIGAS

Artigo 4.- O número de socios será ilimitado. A asemblea xeral poderá suspender, non obstante, a admisión de novos socios cando así o exixan razóns de aforo ou capacidade física das instalacións. Distínguense os seguintes tipos de socios: de número, aspirantes, protectores e honorarios.

Artigo 5.- Son socios de número todas as persoas que realizan regularmente práctica deportiva co club. Distínguense as pertencentes ao equipo de competición (aqueles deportistas que seguen unha planificación e programación deportiva coa finalidade de participaren nos distintos campionatos aos que asiste o club) e os do equipo de ocio (aqueles socios que practican piragüismo sen mención especial á competición). Todos eles terán dereito a gozar dos servizos e instalacións sociais da asociación do club.

Os socios de número menores de idade clasifícanse como socios aspirantes e estarán representados na asemblea do club polos seus pais, con voz e voto, podendo formar parte da xunta directiva.

A cota de socio de número cobrarase por unidade familiar, entendendo por esta aquelas persoas que conviven no mesmo domicilio. Deberase comunicar ao club de forma explícita quen da unidade familiar quere estar considerado como socio.

Os socios protectores achegan axuda económica para os fins sociais e deportivos pretendidos polo club. Teñen como único dereito asistir ás asembleas con voz e voto e formar parte da xunta directiva.

Serán socios honorarios aquelas persoas ás que a asemblea xeral confira esta distinción e terán un posto de referencia nos actos oficiais da sociedade.

Artigo 6.-

1- Os socios terán os seguintes dereitos:

- a) Contribuír ao cumprimento dos fins específicos do club.
- b) Exixir que a asociación se axuste ao disposto na normativa autonómica deportiva e ao establecido no presente estatuto.
- c) Separase libremente da asociación.
- d) Coñecer as actividades da asociación e examinar a documentación, logo de petición razoada ao presidente.
- e) Expor libremente as súas opinións no seo da asociación.



f) Ser elector e elixíbel para os órganos de representación e goberno, sempre que teña plena capacidade de obrar.

2- Son obrigas dos socios de número:

a) Aboar as cotas que exixa a asemblea xeral.

b) Contribuír ao sostemento e difusión do deporte ou modalidades deportivas da sociedade.

c) Acatar cantas disposicións dite a asemblea xeral, a xunta directiva ou o presidente para o bo goberno da sociedade.

Artigo 7.- Para ser admitido como socio, en calquera das dúas modalidades, será necesario:

- Ter a idade sinalada para cada unha delas.
- Solicitude por escrito dirixida ao presidente.
- Satisfacer a cota de ingreso correspondente

Artigo 8.- A condición de socio pérdese:

- Por vontade propia.
- Por falta de pago de cotas sociais durante tres meses consecutivos, despois do requirimento de pago, e consecuente resolución do presidente.
- Por acordo do presidente, de ser o caso, fundado en faltas de carácter grave, despois da audiencia do interesado, que haberá de ser ratificado na primeira asemblea xeral que se celebre.
- Por calquera outra causa establecida na lexislación vixente.

CAPÍTULO III

ÓRGANOS DE REPRESENTACIÓN E GOBERNO

Artigo 9.- Son órganos de representación e goberno do club, a Asemblea Xeral e o Presidente.

Artigo 10.- O Presidente e o órgano executivo do club, posúe a representación legal convoca e preside os órganos de representación e goberno executando os acordos destes.

O cargo de presidente é a título gratuito e carente de interese nos resultados económicos da explotación, por si mesmo ou a través de persoa imposta.

Será elixido mediante sufraxio libre, directo, ou igual e secreto por entre os membros da asemblea xeral, cada 4 anos.

A convocatoria de eleccións á presidencia do club efectuarase polo presidente do mesmo. A partir dese momento, a xunta directiva constituirase en comisión xestora coa única función de facer actos de simple xestión e administración.

O regulamento electoral que será sometido a votación dos asembleístas, determinará como mínimo: o calendario electoral, o censo electoral, e a composición e funcións da xunta electoral e da mesa electoral.



Para ser candidato á presidencia é necesario ser membro da asemblea xeral, non pertencer á comisión xestora, e ter o apoio, como mínimo, do 5% dos membros da asemblea.

Artigo 11.- O presidente cesará por:

Transcorrer o prazo polo que foi elixido.

- a) Dimisión.
- b) Falecemento ou incapacidade física ou psíquica para continuar no exercicio do seu cargo.
- c) Aprobación dunha moción de censura pola asemblea xeral.
- d) Inhabilitación por sentenza xudicial firme ou sanción deportiva.

Artigo 12.-

1- Como órgano complementario de goberno e representación poderá haber unha xunta directiva que actuará como órgano colexiado de xestión do club, e exercerá as funcións que este estatuto lle confire.

2- Os membros da xunta directiva serán designados e revogados libremente polo presidente, debendo dar conta diso na primeira asemblea xeral que se celebre. Da mesma formará parte un secretario e un tesoureiro. Todos os cargos serán gratuítos e carecen de interese nos resultados económicos do club por si mesmos ou persoa interposta.

Artigo 13.-

1- A xunta directiva quedará validamente constituída en primeira convocatoria cando concorran a ela a maioría dos seus membros. En segunda convocatoria será suficiente a concurrencia, polo menos, de tres dos seus membros, e, en todo caso do presidente.

2- A xunta directiva convocarase polo presidente con dous días de antelación como mínimo, á data de celebración. A xunta directiva quedará tamén validamente constituída cando estean presentes tódolos seus membros, aínda que non mediara convocatoria previa.

3- En especial corresponde á xunta directiva:

- a) Dirixir a xestión do club, velando polo cumprimento do seu obxecto social.
- b) Formular o inventario, memoria e presuposto anual, que se someterá a aprobación da asemblea.
- c) Aplicar todas as medidas deportivas, económicas e administrativas precisas para o fomento e desenvolvemento do deporte dentro do club.

Artigo 14.- O secretario da xunta directiva coidará do arquivo da documentación, redactará cantos documentos afecten á marcha administrativa da asociación e levará o Libro de rexistro de socios e Libro de actas.

Artigo 15.-

1- O tesoureiro da xunta directiva será o depositario da asociación, asinará os recibos, autorizará os pagos e levará os libros de contabilidade.



2- Será obriga do tesoureiro formalizar, durante o primeiro mes de cada ano, un balance de situación e as contas de ingresos e gastos, que se porán en coñecemento de todos os asociados.

Artigo 16.-

1- A Asemblea Xeral é o órgano supremo de goberno do club e estará integrada por todos os seus socios de número e protectores.

2- As asembleas xerais, tanto ordinarias como extraordinarias, quedarán validamente constituídas en primeira convocatoria cando concorran a ela a maioría dos seus asociados. En segunda e última convocatoria media hora máis tarde, quedará constituída calquera que sexa o número de membros presentes. Entre a data de convocatoria e o día sinalado para a súa celebración terán de mediar, como mínimo, dez días naturais e non poderán transcorrer máis de 20.

Artigo 17.- A asemblea xeral convocarase polo presidente ou por iniciativa do vintecinco por cento, cando menos, dos socios.

1- A asemblea xeral reunirase con carácter ordinario, despois da convocatoria do presidente, polo menos unha vez ao ano para tratar das seguintes cuestións:

- a) Memoria, liquidación do presuposto, balance do exercicio, rendición de contas e aprobación se procede.
- b) Presuposto para o seguinte exercicio.
- c) Proxecto e propostas do presidente ou da xunta directiva.
- d) Propostas que formulen os socios e que terán de ir asinadas, cando menos, polo cinco por cento dos membros.
- e) Rogos e preguntas.

2- Terá de se celebrar asemblea xeral extraordinaria para a modificación de estatutos, elección do presidente, toma de cartos a préstamo, emisión de títulos representativos de débeda ou de parte alícuota patrimonial, alleamento de bens inmoables e fixación de cotas dos socios, e calquera outro acordo previsto nestes estatutos ou que se estime oportuno polo presidente ou proceda legalmente.

Artigo 18.- Os acordos da asemblea xeral adoptaranse por maioría simple dos presentes, requiríndose unha maioría cualificada e un quórum determinado de asistencia para aqueles asuntos que establezan os estatutos. Serán vinculantes e de obrigado cumprimento e terán forza executiva a partir da data da súa adopción, sen prexuízo, por razón da materia, da posibilidade da súa impugnación perante os órganos competentes e da federación galega deportiva da modalidade ou perante o Comité Galego de Xustiza Deportiva.

CAPÍTULO IV

RÉXIME DOCUMENTAL

Artigo 19.- O réxime documental do club constará dos seguintes libros: rexistro de socios, de actas e contábeis.



Artigo 20.- No libro de rexistro de socios terán que constar os nomes e apelidos dos socios de número e protectores, o seu D.N.I. e, de ser o caso, os cargos de representación, goberno e administración que exerzan no club. Tamén hanse especificar as datas de altas e baixas, e as de toma de posesión e cese nos cargos aludidos.

Artigo 21.- No libro de actas, consignaranse as reunións que celebre a asemblea xeral e a xunta directiva, con expresión da data, asistentes, asuntos tratados e acordos adoptados. As actas terán de estar asinadas, en todo caso, polo presidente e o secretario.

Artigo 22.- Nos libros de contabilidade figurarán tanto o patrimonio como os dereitos e obrigas, e ingresos e gastos do club, debéndose precisar a procedencia daqueles e o investimento ou destino de estes.

RÉXIME DISCIPLINARIO

Artigo 23.- Os órganos e socios do club estarán sometidos ao regulamento disciplinario do club e ao disposto no título VII da Lei 11/1997 xeral do deporte de Galicia e normativa do seu desenvolvemento.

Artigo 24.- Así mesmo o presidente e os membros da xunta directiva responderán fronte os socios, o club ou terceiros dos prexuízos que ocasionaran por culpa ou negligencia grave, de conformidade coa regulamentación propia do club e o ordenamento xurídico vixente.

CAPÍTULO V

RÉXIME ECONÓMICO-FINANCIERO E PATRIMONIAL

Artigo 25.-

1- No momento da creación do club, o patrimonio fundacional é de corenta mil pesetas, e dispón das seguintes instalacións e locais propios: ningún.

2- No futuro o patrimonio do club estará integrado por:

- a) As achegas económicas dos socios, que aprobe a asemblea xeral.
- b) As doazóns e subvencións que reciba.
- c) Os resultados económicos que pode producir as manifestación físico-deportivas que organice a entidade.
- d) As rendas, froitos e intereses do seu patrimonio.

Queda expresamente excluído como fin do club o ánimo de lucro e a totalidade dos seus ingresos e beneficios aplicaranse ao cumprimento dos fins sociais.

Artigo 26.- O club poderá gravar e allear bens, mobles e inmobles, tomar diñeiro a préstamo e emitir títulos transmisíbeis representativos de débeda ou parte alícuota patrimonial, sempre que cumpra os seguintes requisitos:



- 1- Que se autoricen tales operacións por maioría de dous terzos dos socios presentes ou representados na asemblea xeral extraordinaria.
- 2- Que ditos actos non comprometan de modo irreversible o patrimonio da entidade ou actividade físico-deportiva que constitúa o seu obxecto social. Para a adecuada xustificación deste aspecto poderase exixir, sempre que o soliciten como mínimo o cinco por cento dos socios de número, o oportuno dictame económico-actuarial.
- 3- Cando se trate de gravar ou allear bens, mobles e inmobles que foran financiados, en todo ou parte, con fondos públicos da Comunidade Autónoma será preceptiva a autorización previa do órgano competente da Xunta de Galicia.

Artigo 27.- O club poderá emitir títulos de débeda ou de parte de alícuota patrimonial, que serán nominativos.

Os títulos inscribíranse nun libro que levará para o efecto o club, no que se anotarán as sucesivas transferencias.

En todos os títulos constará o valor nominal, a data de emisión, e, de ser o caso seu caso, o xuro e prazo de amortización.

Artigo 28.- Os títulos de débeda só se poderán subscribir polos asociados, e a súa posesión non conferirá dereito ningún especial aos socios, agás a percepción dos xuros establecidos conforme a lexislación vixente.

Artigo 29.- Os títulos de parte alícuota patrimonial han de ser, asemade, subscritos polos asociados. En ningún caso estes títulos darán dereito á percepción de dividendos ou beneficios.

Artigo 30.- Os títulos de débeda e parte alícuota patrimonial serán transferidos unicamente entre os que teñan a condición de socios.

CAPÍTULO VI

REFORMA DOS ESTATUTOS E DISOLUCIÓN DO CLUB

Artigo 31.- Os presentes estatutos só se poderán modificar, reformar ou derrogar, por acordo da asemblea xeral extraordinaria convocada para tal efecto, mediante votación favorable dos dous terzos dos socios de número asistentes.

A reforma destes estatutos seguirá, con respecto ao rexistro de asociacións deportivas e deportistas de Galicia, os mesmos trámites administrativos que para a súa inscrición.

Artigo 32.- O club extinguirase ou disolverase por acordo de:

- a) Dous terzos dos socios en asemblea xeral extraordinaria, convocada para o efecto.
- b) Por sentenza xudicial.
- c) Por outras causas legalmente determinadas.

En todo caso deberá ser notificado ao Rexistro de asociacións deportivas e deportistas de Galicia.



Artigo 33.- Disolto o club, o remanente do seu patrimonio social, se o houber, aplicarase a fins análogos de carácter deportivo ben por acordo previo da asemblea xeral ou subsidiariamente polo órgano competente en materia de deporte da Xunta de Galicia.

E para que conste, para os efectos de anotar a modificación dos estatutos do club, no Rexistro de asociacións deportivas e deportistas de Galicia, asino a presente en Pontedeume o trece de marzo de dous mil seis.

VºPr.
O PRESIDENTE

O SECRETARIO

Asdo.: Ramiro Piñeiro Oliveira

Asdo. Enrique Salvadores López

ESTA MODIFICACIÓN FOI RATIFICADA POLA DELEGACIÓN PROVINCIAL (SERVICIO DE DEPORTES) DA CONSELLERÍA DE CULTURA E DEPORTES E INSCRITOS NO REXISTRO DE ASOCIACIÓNS DEPORTIVAS E DEPORTISTAS DE GALICIA O 20 DE MARZO DE 2006.